

Incumbensa Niggli-Mathis (Grüşch) concernent la toleranza da mesiras da defensiun per realisar il scumond da pavar selvaschina

Durant envierns cun blera naiv, sco che nus l'avain ussa puspè, arriva la selvaschina pli e pli en la vischinanza da vitgs e da bains purils. Las restanzas da pavel ord la tegnida d'animals da niz (sin ladimers u deponias verdas e deposits da ballas da silo) substitueschan il nutriment sepulì sut la cuverta da naiv cunzunt per noss tschiervs. Ils animals selvadis fomentads n'han betg tema da s'avanzar fin en las stallas per dustar lur fom cun il pavel preparà per la proxima pavlada dals animals da niz. En l'artitgel 29a da la lescha chantunala da chatscha è dentant fixà in scumond da pavar explicit. En l'artitgel 31 vegnan menziunadas las mesiras da defensiun. Quellas vegnan descrittas pli detagliadamain en l'ordinaziun chantunala tar la lescha da chatscha a partir da l'artitgel 17. En l'artitgel 19 da l'ordinaziun importa la tariffa da contribuziun per custs imputabels 20 pertschient fin 60 pertschient. Quai en dependenza dal fatg, quant ferm che la saiv respectiva sto vegnir attribuida predominantamain u exclusivamain a la defensiun da selvaschina.

En l'agricultura grischuna vegnan plazzadas oz autas saivs per proteger cunter las ruissas da selvaschina. Quai vegn deducì da la legislaziun da chatscha, dentant er per motivs dal cumbat cunter epidemias (tuberculosa en l'exteriur vischin, cunzunt en il Vorarlberg). Ils custs per cumprar las saivs importan – sch'i vegn construì correctamain – plirs millis francs per manaschi agricul. Las sutsegnadras ed ils sutsegnaders èn da l'avis che quai surpassia la dimensiun da la toleranza.

Perquai incumbensain nus la regenza d'integrar en l'artitgel 18 da l'ordinaziun tar la lescha da chatscha ils custs per las saivs che servan a proteger ils deposits da pavel e las deponias da restanzas da pavel sin l'areal dal bain puril, e d'indemnisar quels correspudentamain a l'artitgel 19 da l'ordinaziun. Questas mesiras ston vegnir messas en vigur retroactivamain per il 01-01-2017. Per quest termin èn questas mesiras er vegnidas realisadas en l'interess public e per motivs da la polizia d'epidemias en il territori da cunfin cun l'Austria.

Cuira, ils 13 da favrer 2019

Niggli-Mathis (Grüşch), Crameri, Lamprecht, Berther, Brandenburger, Della Cà, Derungs, Ellemunter, Fasani, Favre Accola, Giacomelli, Gugelmann, Hitz-Rusch, Kasper, Kunz (Fläsch), Loi, Michael (Donat), Müller (Susch), Niggli (Samedan), Salis, Sax, Tanner, Valär, Widmer-Spreiter (Cuira), Wieland, Zanetti (Sent), Buchli (Tenna), Collenberg, Jegen, Ulber Daniel